

夢占類考

夢占類考卷四

長洲張鳳麟伯起編

鱗介部

龍 兩龍挺白圖

黃帝脩德立義天下大治乃召天老而問曰予夢見兩龍  
挺白圖以授予於河之都天老曰河出龍圖雒出龜書紀  
帝錄列聖人之姓號興謀治太平然後鳳凰處之今鳳凰  
已下三百六十日矣天其授帝圖乎黃帝乃祓齋七日至  
於翠嬀之川大鱸魚折溜而至乃與天老迎之五色畢具  
魚汎白圖蘭葉朱文以授黃帝名曰錄圖

河圖挺佐輔

蒼龍據腹

漢虜魏王豹薄姬輸織室詔納後宮歲餘不得幸始姬少時與管夫人趙子兒相愛約曰先貴無相忘已而管夫人趙子兒先幸漢王坐河南宮成臯臺此兩美人相與笑薄姬初時約漢王聞之問其故兩人具以實告漢王心恻然憐薄姬是日召而幸之薄姬曰昨夜妾夢蒼龍據腹王曰此貴徵也吾為汝遂成之一幸生男是為代王其後薄姬從子之代而為代王太后代王立十七年高后崩大臣迎立之是為文帝

漢書

乘赤龍上天

光武曰我昨夜夢乘赤龍上天覺悟心中動悸馮異因下  
席再拜賀曰此天命發於精神心中動悸大王重慎之性  
也異遂與諸將定議上尊號後漢書

龍頭授已

孫權潘夫人父爲吏坐法死夫人輸織室權見而異之召  
充後宮得幸有娠夢有以龍頭授已以蔽膝受之遂生孫  
亮吳志

龍不見尾

孫休夢乘龍上天回顧不見尾覺而異之後太子不得立  
休遂爲帝至孫皓繼之吳以亡吳志

兩龍抗膝

孝武太后李氏以微賤入為會稽王宮人夢兩龍抗膝入懷太祖異而召之生烈宗

晉中興書

兩龍枕膝

簡文帝欲採納諸姬以隆奕世之緒令善相者召諸愛妾示之皆云非其人又悉以諸婢媵示焉時李太后為宮人在織坊中形長而色黑宮人皆謂之崑崙既至相者驚云此其人也帝以大計召之侍寢後數夢兩龍枕膝日月入懷意以為吉祥向儕類說之帝聞而異焉竟生武帝

晉書

龍據屋

齊世祖蕭贖以宋元嘉二十七年六月己未生於建康將產之夕二母並夢龍據屋故小字爲龍兒

南史

### 捉龍脚

宋明帝遣前淮南太守孫奉伯往淮南奉伯舊與蕭道成款是行也道成與奉伯同室臥奉伯夢道成乘龍上天於下捉龍脚不得及覺叙夢因謂兗州當大庇生靈而弟不得與也時道成爲兗州故云及道成登帝位奉伯已先卒

南史

### 龍罩體

梁阮修容有娠夢龍罩其體後生元帝

梁書

化龍通夢

梁郁后酷妬忌及終化爲龍入於後宮通夢於帝或見形  
光彩照耀帝體將不安龍輒激水騰涌於露井上至殿衣  
服委積常置銀轆轤金瓶灌百味以祀之故帝卒不置后

青龍出懷

陶弘景母有娠夢青龍出懷是生弘景及長聰識博達因  
讀神仙傳有乘雲馭龍之志

梁書

乘龍上天

祖珽謂長廣王言殿下有非常骨法孝徵夢殿下乘龍上  
天王謂曰若然當使兄大富貴及卽位是爲武成皇帝擢

拜珽爲中書侍郎孝徵珽字也

北史

### 斷龍大龍蠕龍浴龍

齊婁太后孕文襄夢一斷龍孕文宣夢大龍首尾屬天地張口動目勢狀驚人孕孝昭夢蠕龍於地孕武成夢龍浴於海

北史

### 龍飛西南

石季龍夢龍飛西南自天而落旦而問佛圖澄澄曰禍將至矣宜父子慈和慎之慎之季龍引澄入東閣與其后杜氏訊之澄曰脇下有賊不出十日自浮圖以西此殿以東當有血流慎勿東也杜后曰和尚耄耶何處有賊澄卽易



語云六情所受皆悉是賊老自應羞但使少者不昏卽好  
耳遂便寓言不復彰明後二日宣果遣人害韜於佛寺中  
欲囚季龍臨喪殺之季龍以澄先誠故獲免

北史

### 龍飛墮地

隋煬帝生時獨孤后夢龍出身中飛高十餘里墮地尾斷  
以告文帝文帝默然

隋書

### 化爲千數小龍

釋澄觀常思付授忽夜夢身化爲龍矯首於南臺蟠尾於  
山北拏攫碧落鱗鬣耀日須臾蜿蜒化爲千數小龍騰躍  
青冥分散而去蓋取象乎教法支分流布也遂於中條山

棲巖寺住寺有禪客拳肩剪髮字曰癡人被短褐操長策  
狂歌雜語凡所指斥皆多應驗觀未至之前狂僧驅衆僧  
洒掃曰不久菩薩來此以元和年中示滅

神僧傳

### 四龍入心眼

釋世瑜於貞觀元年夢四龍來入心眼既覺大悟三論宗  
旨

神僧傳

### 乘龍升天

唐宣宗初封光王嘗夢乘龍升天言之於鄭后曰此不宜  
人知者幸勿言歷太和會昌間愈事韜晦及武宗崩遂以

皇太叔嗣大位

唐書

神龍欲出宮

孟蜀母后之宮有衛聖神龍堂嘗修飾嚴潔蓋卽世俗之家堂神也一旦別欲廣其殿宇因晝寢夢一青衣謂后曰令神龍意欲出宮外居止宜于寺觀中安排可也后欲從之而蜀主未許后又夢見青衣重請因選昭覺寺廊廡間特建一廟土木就緒遂宣教坊樂自宮中引出歸新廟中奏迎神曲其日玄雲四合大風振起及神歸位雨卽滂沱或曰衛聖神龍出離宮殿是不祥也逾年國亡

野人閒話

黑蛇化龍

宋太祖微時客遊漢東依漢隨州刺史董宗本宗本子遵

誨夢黑蛇長百尺餘化龍東北去雷電隨之以語太祖及太祖卽位召見遵誨曰卿尚記化龍之夢乎

宋史

### 黑龍蟠樹上

謝深甫過父友對飲留宿夜半酒渴無從得水牕前梨熟深甫遂登樹啖之爲犬所吠不得下主人夢黑龍蟠樹上啓戶視之則深甫也遂以女妻之深甫果至宰相

夢譚

### 兩龍盤旋

宋鄒應龍初名某未試前乞夢於大乾廣祐王廟夢室內兩龍盤旋已騰上一龍之背越前而出旣覺遂更今名次年省闈莫子純首冠鄒居第二因親策士以子純有官不

可以為首乃依故事升鄒為大魁

龍降其家

文天祥母將誕夢有龍降其家遂生天祥

狀元錄

龍蛻爪於門外石

有一客店主夢龍蛻爪於門外石迨曉見文天祥脫履於

石少憇而去

文山集

白龍翁來

鄭獬嘗病傷寒夢身化為龍浴於大洪山池中池上人呼曰白龍翁來蓋此處有白龍黑龍二池之名故也獬後得

及第

黑白二龍

高皇夜夢內殿左右楹柱有黑白二龍繞之而鬪左黑者  
勝明日偶見太孫與燕邸各抱一柱而嬉燕邸在左  
焉明興雜記

白龍入室

陳檢討獻章生前一夕母夢白龍入室其光如晝迨後獻  
章中正統丁卯鄉試以特薦授翰林檢討為本朝名儒  
兩龍下攫其中

吳文定寬會試前夢過國學適陰雲四合大雷電欲雨龍  
下攫其中併其身而上遂驚寤無何狀元及第近峰聞略

乘龍而墜

詳幃服部趙孝成王

二白龍夾舫

詳地理部劉穆之

負白龍升天

詳成器部趙汝愚

乘龍上天至屋而止

詳棟字部郭瑀

魚 衆維魚矣

牧人乃夢衆維魚矣

衆謂人也人如魚之多也

旄維旟矣

旄郊野所建統人少旟州

里所建統人多謂旄所  
統如旗所統之多也

大人占之衆維魚矣實維豐年旄

維旗矣室家溱溱

詩經無羊之卒章言衆維魚則爲豐  
年之應旄維旗則爲多盛之象也

魚求去鈎

漢原人釣魚於昆明池綸絕而去武帝夢魚求去其鈎明  
日帝戲於池見大魚啣索帝曰豈非昨所夢乎取魚去其  
鈎而放之 辛氏三秦記

魚變爲人

左賢王劉豹妻呼延氏祈子於龍門俄而見一大魚頂有  
二角軒鬚躍鱗而至祭所久之乃去其夜夢此魚變而爲  
人左手把一物大如半雞子光景非常授呼延氏曰此是



日精服之生貴子寤而告豹豹曰吉祥也自是十二月而生子左手有文曰淵遂以名焉至晉永興初稱帝都平陽

北史

### 大魚食蒲

秦主苻生夢大魚食蒲又長安謠曰東海大魚化為龍問在何所洛城東蒲苻氏故姓也東海苻堅所封也堅時為龍驤將軍其弟在洛陽之東此堅將王秦之徵也苻生不知是堅以謠夢之故殺其侍中魚遵

北史按大魚之云似於堅無當應是鮮卑

慕容氏之兆

### 魚嚙嬰兒

唐河東柳沂僑居洛陽因乘春釣伊水得巨魚挈歸置盆水中先是沂有嬰兒始六七歲是夕沂夢魚以喙嚙嬰兒臆沂驚寤兒亦自言夢大魚嚙臆痛不可忍而啼沂視兒臆果有瘡血沂懼明旦以魚投伊水中旬餘兒瘡愈沂自後不復釣

宣室志

### 大魚躍盆水中

宋胡安國弟生子寅母以多男不欲舉安國妻夢大魚躍盆水中急取而子之寅少桀黠難制父閉之空閣上有雜木寅盡刻爲人形安國曰當有以移其心別置書數千卷於上年餘寅悉成誦後游辟雍中進士甲科又以薦除秘

書省校書郎多所建白竟爲名臣云

身爲魚

越州有盧冊者在山陰縣顧樹村與表兄韓確同居確自幼嗜鱸嘗憑吏求之方寐夢身爲魚在潭有相忘之樂見二漁人乘艇張網不覺身入網被取擲桶中覆之以葦復覩所憑吏就商價吏卽捐鯁貫綆楚痛不可言及至舍歷認妻子奴僕有頃寘砭刀若脫膚首落方覺神癡良久冊驚問之確具述所夢冊遽呼吏訪所市魚處泊漁子形狀與夢不異遂買魚放之確後從釋住祇園寺

西陽雜俎

群魚來謝

陳傲吳江縣吏也平生廣行陰德但未能斷食魚嘗於池中養魚以待烹啜方欲斫膾待賓忽聞池中似人言乞命於是盡放其魚於江是夜夢群魚來謝曰玉帝知君放我等萬命已令天曹掛名仙籍三年後果於長橋白日上昇

姑蘇志

### 魚膏雜油中

廬山賣油者養其母甚孝爲暴雷震死其母自以無罪曰號泣于九天使者之祠願知其故一夕夢朱衣人告曰汝子恒以魚膏雜油中以圖厚利凡齋醮用此油則腥氣熏烝神靈不降震死宜矣母遂不復號泣

稽神錄

魚化爲鳥

詳說夢部蕭方等

群羊負魚

詳走獸部石季龍

蛇

天使殺蛇

晉文公出有大蛇如拱當道文公乃修德使吏守蛇守蛇  
吏夢天使殺蛇謂曰蛇何故當聖君道覺而視之蛇則臭  
矣

博物志

蛇自天屬地

秦文公東獵汧渭之間卜居之而吉文公夢蛇自天下屬

地其口止於鄜衍文公問史敦敦曰此上帝之徵君其祠之於是作鄜時用三牲祭白帝焉漢興高祖初起殺大蛇有物曰蛇者白帝子而殺者赤帝子也

前漢書其略見史記封禪書

### 蛇生四足

東平劉楨夢蛇生四足穴居門中使周宣占之宣曰此爲國夢非君家之事也當殺女子而作賊者頃之女賊鄭姜遂俱夷討以蛇女子之祥足非蛇之所宜有故也

魏志

### 蛇繞身

唐琮夢蛇繞身遂効其形作草蛇之書

王隱晉書

### 大蛇繞身

李雄母羅氏因汲水忽然如寐夢大蛇繞身遂有孕十四月而生雄後竟有蜀土

蜀志

令蛇纏身

唐武德間江陵人力昌殺一大蛇一夕力昌死夢告其妻曰我在生殺一蛇今被訴於閻摩天子追我魂至冥司令蛇纏身噬齧苦痛難忍須為我請僧寫金剛經七卷懺悔救厄妻覺鬻五歲子與蜀客得錢寫經已而憶子盲目但每日誦經求乞後蜀客死子得其貲歸江陵追念母初至未及尋因遇節臘祀祖廣設齋事丐者盈門數中一瞽嫗口誦金剛經自言鬻子薦夫事細問之卽其母也母子遂

復合悲喜異常毋目尋亦愈

報應記

### 蛇自臍入腹

范延光嘗夢大蛇自臍入腹半入而掣去之以問術士張生張生曰蛇龍類也龍入腹中王者之兆自是延光頗蓄異志在唐事明宗及末帝俱為樞密節度使復降晉高祖以見疑不能容為楊光遠所讎推墮水溺死

五代史按半入掣去豈得

為祥

### 以罪為蛇

無錫張氏女死其母夢女曰我以罪為蛇既覺得蛇於棺下以告高僧宗本本為說法復置故處俄有黑蟬翔棺上



蛇失所在母祝曰若我女當入籠中蟬如其祝本復為說  
法是父母夢女曰二報已解脫矣

無錫志

維虺維蛇

詳走獸部詩云維虺維蛇女子之祥

蛟  
懷蛟

董仲舒夢蛟入懷遂作春秋繁露

龜

龜須秦庭

秦主苻堅初年高陸人穿井得龜大三尺背有八卦文堅  
命太卜池養之食以粟及太元末年龜死藏其殼於太廟  
其夜廟丞高虜夢龜謂之曰我本出將歸江南遭時不遇

殞命秦庭又夢人謂虜曰龜三千六百歲而終終必妖興  
亡國之徵也

北史

### 龜獻奇方

有一人患傷折醫云宜用生龜尋捕一龜將殺之一夕忽  
夢龜告曰勿相害吾有奇方可療但用生地黃一斤生薑  
四兩炒令均熟以布袋罨傷折處卽愈矣旣寤試之果効

### 江畔老龜

紹興五年秋湖口人林四日暮馳馬顛墜折一足骨斷醫  
莫能治偶一道人過門聞號哭聲而問其故入視之曰續  
筋接骨非龜板不可茲去五里許江畔一大龜身闊二尺

捕而脫其殼燒灰傳損處賢於小者百數也時已昏暮未暇遣捕半夜後鄰家張翁夢烏衣人來訪自稱爲江畔老龜哀投甚切云林四折足醫欲殺吾取殼以療傷望爲救護張謝曰老夫愚鈍如何施力烏衣云只煩丈人詣林氏諭衆醫曰往日曾有龜傳一方於人而續命者用淹藏瓜糟罨斷處次將杉板夾縛如定更增赤小豆拌入糟中尤妙願丈爲告之異日當圖報遂去黎明張如所戒林與醫皆喜而從之應期而驗

類編

### 大龜以身嚴佛像

嘉定中譚思通初菴名崇壽鑿井得木佛金粉雖褪模刻

宛然因大拓規模名靜信寺像設未備忽一夕夢大龜云  
願以身嚴佛像翌日見一大龜引六龜乘潮至浮于岷浦  
之上思通嘆曰吾安忍害物命以營繕乎遂縱于海未幾  
崇明州施光遠者亦感是夢遂取殺之得玳瑁鸞錢詣譚  
氏以成佛像光遠者思通之姻也二人會次言之若合符  
節今寺勒石以記

姑蘇志

龜  
大龜嚙足

宗伯瞿公景淳以會元榜眼官內翰主應天鄉試時大學  
士王公錫爵魁春秋迨瞿丁內艱歸過王宿焉夢大龜嚙  
其足詰朝向王公述之曰此吾子春闈首舉之兆也後春

麟介

卷之四

榜科名果躡瞿之跡焉

狀元錄

三箭插黿上

詳成器部王文恪

昆蟲部

蝶

蝴蝶栩栩

昔者莊周夢爲蝴蝶栩栩然蝴蝶也自喻適志與不知周也俄然覺則濛濛周也不知周之夢爲蝴蝶與蝴蝶之夢爲周與周與蝴蝶則必有分矣此之謂物化

齊物論

蟲

飛蟲無數

明德馬皇后選入太子宫時年十三禮則修備上下安之

遂見寵異顯宗卽位以後爲貴人時賈氏亦以選入生肅  
宗帝令后母之后於是盡心撫育勞悴過於所生后常以  
皇嗣未廣每懷憂歎薦達左右若恐不及忽夢有小飛蟲  
無數赴着身又入皮膚中而後出居數日有司奏立長秋  
宮帝未有所言皇太后曰馬貴人德冠後宮即其人也遂  
立爲皇后

後漢書

蠅

青蠅矢

昌邑王賀就徵旣卽位夢青蠅之矢積西階東可五六石  
以屋版瓦覆問郎中令龔遂遂曰詩不云乎營營青蠅止  
於藩豈弟君子毋信讒言陛下在側讒人衆多如是青蠅

惡矣

惡即知也

宜進先帝大臣子孫親近以爲左右如不忍昌

邑故人信用讒諛必有凶咎願詭禍爲福皆放逐之臣當先逐矣賀不用其言卒至於廢

前漢書

青蠅在鼻上

詳人身部何晏

蟻

蟻穴兩腋

黃庭堅初見清老清云學士前身是一女子我不詳語後日至涪陵當有告者黃旣坐黨人遷涪夢一女子語之曰我生前誦法華經志願後身爲男得大智慧爲時名人今學士其後身也學士年來所患腋氣緣我棺朽蟻穴兩腋

故有此苦此後山卽我墓學士能啓之爲除其蟻則腹氣  
除矣既覺訪視啓墓如言除戢腋病遂平

春渚錄

### 蟻中之王

富陽縣董昭之乘船過錢塘江江中見一蟻著一短葦蓮  
遽畏死因以繩繫葦著船船至岸蟻得活其夜夢一烏衣  
人謝云僕是蟻中之王也感君見濟之恩後有急難當相  
告語歷十餘年時所在劫盜昭之被橫錄爲劫主繫餘姚  
昭之因思前夢取三兩蟻著掌中語之夜果夢烏衣云可  
急投餘杭山旣寤蟻齧械已盡因得出獄入餘杭山旋遇  
赦得白云

齊諧記



蝦蟆 生菜蝦蟆毒

詳醫藥部丘傑

蠶 十一月養蠶

給事中陳安平子年滿赴選與鄉人李仙藥臥夜夢十一月養蠶李仙藥占曰十一月養蠶冬絲也君必得冬司數日果授工部

朝野僉載

蝟 大蝟破鄴城

北齊河清末武成帝高湛夢大蝟攻破鄴城故索境內蝟膏以絕之不知後主名緯聲音與蝟相協乃亡齊之徵也

蛆 牀下群蛆

唐高祖舉兵夢身死墜牀下為群蛆所食智滿禪師曰公  
得天下矣牀下者陛下也群蛆食者億兆共仰一人活也  
神異錄

品物部

五穀  
極上有三穗禾

蔡茂初在廣漢夢坐大殿極上有三穗禾茂跳取之得其  
中穗輒復失之以問主簿郭賀賀離席慶曰大殿者官府  
之形象也極而有禾人臣之上祿也取中穗是中台之位  
也於字禾失為秩雖曰失之乃所以得祿秩也袞職有闕  
君其補之旬月而茂徵代戴涉為司徒焉乃辟賀為掾

後

漢書

西籬下有粟

劉殷居貧孝養嘗夜夢人謂之曰西籬下有粟寤而掘之得粟十五鐘銘曰七年粟百石以賜孝子劉殷自是食之七年方盡

晉書

小麥漬脚

李禮之與妻鄭氏相重妻先亡遺言終不獨死未幾禮之脚上發腫夢妻云煮小麥漬之卽差既寤如其言反創而

卒

北齊書

磨麥蓮花落

寧波一婦以兵亂與夫及子相失寄食老尼一夕夢人使磨麥又見蓮花盡落覺而心惡之以語尼尼曰吉祥也問其故尼曰磨麥者將見夫面也蓮花落蓮子得見也無何果得聚首云

禾中走

詳走獸部尼妙寂

蔬

滿城出菜

苻堅將欲南伐夢滿城出菜又地東南傾其占曰菜多難為醬也東南傾江左不得平也

北史

菜與殿齋

真宗臨軒策士夜夢殿下有菜一苗甚盛與殿基相齊及拆第一卷蔡齊上見其狀堂堂曰得人矣詔金吾給衛士七人清道尋詔自今第一人及第令給七人當直許出入則兩對引唱傳呼狀元始爲定制

東齊遺事

### 生菜蝦蟆毒

詳醫藥部立條

瓜 人與瓜

後魏宋瓊母病冬月思瓜瓊夢見人與瓜覺得之手中時

稱孝感 夢雋

縣縣生之瓜

詳人身部衛侯

蕪  
蘿蔔火吾宮

齊州有人病狂夢歌曰五靈華益曉玲瓏天府由來汝府  
中惆悵此情言不盡一丸蘿蔔火吾宮又歌曰踏陽春人  
間二月雨和塵陽春踏盡秋風起腸斷人間白髮人後遇  
一道士作法治之乃云夢中見一紅裳少女引入宮殿皆  
紅紫飾小姑令歌道士曰此正犯大麥毒女則心神小姑  
脾神也按醫經蘿蔔治麪毒故曰火吾宮即以藥并蘿蔔  
食之遂愈

洞微志

芝蘭  
青雲芝

羊惜夢入洞府有一物飛去神人曰此青雲芝也

五色芝產門楣

王待制禕大父爲石峽書院山長一夕夢五色芝產門楣翌日生禕識者以爲文章之兆公幼秀爽敏慧國初以聘起累官翰林待制有文名奉使諭雲南死節謚忠文

授芝草

尚寶少卿陸公師道夢登高樓遇道士授以芝草明日過高真道院徐道士出芝庭卷求詩恍悟昨夢遂題二十八字昨夢登真度飛閣羽人乞我金光芝高真院裏逢三秀忽悟清霄土雪姿

陸符卿集

吞芝

詳名姓部申泰芝

蘭

天使與巴蘭

鄭伯蘭卒

穆公也

初鄭文公有賤妾曰燕姑夢天使與巴蘭

曰余爲伯儵余而祖也

伯儵南燕祖

以是爲而祖以蘭有國香

人服媚之如是旣而文公見之與之蘭而御之辭曰妾不才幸而有子將不信敢徵蘭乎公曰諾生穆公名之曰蘭文公報鄭子之妃曰陳嬀生子華子臧子臧得罪而出誘子華而殺之南里使盜殺子臧於陳宋之間又娶於江生公子仕朝于楚楚人醜之及葉而死又娶於蘇生子瑕子



俞彌俞彌早卒洩駕惡文公亦惡之故不立也公逐群公  
子公子蘭奔晉從晉文公伐鄭石癸曰吾聞姬媯耦其子  
孫必蕃媯吉人也后稷之元妃也今公子蘭媯甥也天或  
啓之必將爲君其後必蕃先納之可以亢寵與孔將鉏侯  
宣多納之盟于大官而立之以與晉平穆公有疾曰蘭死  
吾其死乎吾所以生也刈蘭而卒

左傳

著  
卜著一具

齊褚彥回少病篤夢人與卜著一具遂差果年四十九而  
薨

著草增一

詳什百部孫承祐

松

梓化為松栢棫柞

太姒夢商庭產棘太子發移周庭之梓樹於闕梓化為松  
栢棫柞覺以告文王召太子發占之吉是受商之大命

松出腹

丁固初為尚書郎夢松出其腹謂人曰松字十八公十八  
年吾其公乎遂為司徒

張勃吳錄

松圍二尺

鍾輻植松夢朱更曰松圍二尺子當及第後果然

松生戶棗生屋

有一人夢松生戶前一人夢棗生屋上以問補闕于董董  
言松丘壠間所植棗字重來重來呼魄之義俱非吉祥後  
二人俱卒

酉陽雜俎

栢  
側栢葵花

光化中劉道濟止天台山夢一女子引入牕下有側栢葵  
花無何前至奉化縣古寺見有一牕側栢葵花宛夢中所  
見問之寺僧云有一客官女甚美至此中心疾而死蓋道  
濟所夢乃此女之魂也

唐史

青栢枝

正九年十三時病甚父抱詣青華觀許爲道士後夢一老

人出青栢枝令啗及覺遂不食惟食生菓清泉而已大宗  
召赴闕賜名趙自然繁昌志

### 栢葉仙人來

田鸞長安世家也欲求長生術入華山遇一黃冠指栢樹  
示之曰此卽長生藥也但欲食之無間耳鸞歸取栢葉曝  
乾爲末服之漸覺煩熱至八年無間熱如火遍體潰爛鸞  
食之不輟一日覺小可須湯沐浴遂得寢三日方寤諸瘡  
掃去膚肉光澤自云初寢夢黃冠數人持節引謁上清見  
列仙皆云栢葉仙人來遂授以仙術勒名玉牌金字謂曰  
且止人間後當相召復引而歸鸞自此辟穀至百二十三

歲得尸解云化源記

卷之四

三十二

香鑪峯檉栢

釋智晞創造堂殿悉皆嚴整惟經臺未構始欲僦工衆議  
經營豈可率爾其香鑪峯檉栢木中清勝可共取之以充  
供養往諮於晞晞良久曰山神護惜不可造次是夜夢人  
送疏云香鑪檉栢樹盡皆捨給經臺神僧傳

松栢不改

詳文翰部蕭燧

梧

前園橫生梧桐

吳王夫差夢前園橫生梧桐公孫聖曰前園橫生梧桐者

梧桐心空不為用器但為盲僮與死人俱葬也詳地理部  
梧桐椎

涼王士業將謀東伐有燉煌父老令狐熾夢白頭公衣恰  
而謂熾曰南風動吹長木梧桐椎不中穀言訖不見桐椎  
士業小字也師出果為蒙遜所害史

縣後何家桐甚良

何敬叔少奉佛作一檀像未有木先夢一沙門衲衣杖錫  
來云縣後何家桐甚良覺後如夢求之果得真祥記

梓  
中庭生梓樹

漢武帝幸平陽公主家幸衛子夫遂納於宮中歲餘不得

見子夫請出上曰吾昨夜夢子夫中庭生梓樹數株豈天  
意乎是日幸之有娠生女凡三幸生二女一男男卽戾太  
子也

漢史

槐

### 三槐之間

孔子夜夢三槐之間豐沛之祔有赤烟氣駝車對楚西北  
觀之見芻兒敵鹿傷其左足薪而覆之

沈約宋書

### 大槐南柯

唐淳于棼住廣陵東宅有大古槐時飲其下一日病臥夢  
二紫衣自言槐安國王使者相邀呼之曰駙馬因娶之以  
女且命爲南柯太守貴幸用事者若二十年事迨寤身依

然臥日隱西垣矣生驚感出尋槐下一穴知卽夢中所經  
入處將謂邪祟遂命僕荷斧斤斷握見旁可袤丈有大穴  
洞上有積土爲城郭樓臺之狀有蟻數斛聚其中其卽所  
謂槐安國乎直上南枝可三四丈亦有土穴其卽所領南  
柯郡乎人始悟人世之倏忽亦若此云愚意未必實有是  
夢其說頗類邯鄲

枕記然取其足以  
徵世故錄之

### 臥槐樹下

詳天象部元順木傍有鬼也

桑

### 空桑之中

孔子毋徵在遊大冢之陂睡夢黑帝使請於已交語曰女



乳必於空桑之中覺則若感而生孔子

春秋孔演圖

井中生桑

詳棟字部何祗

楓 楓生腹上

張志和毋夢楓生腹上而產志和

梨 分梨

楊進賢任南陽刺史登舟遇風失其子夫婦想念甚切忽夜夢與兒剖一梨因自解曰剖梨分離也明日迷所夢於友友曰分梨則見子矣不旬日果得其子

柳 柳樹仆地

柳宗元自永州司馬徵至京時意望錄用一日詣卜者告以夢白余柳姓也昨夢柳樹仆地其不祥乎卜者曰無苦但憂爲遠官耳夫生則柳樹死則柳木木者牧也君其牧柳州乎後竟如其言

因話錄

櫟 匠石歸櫟見夢

匠石之齊至乎曲轅見櫟社樹其大蔽牛絜之百圍其高臨山十仞而後有枝其可以爲舟者旁十數觀者如市匠石不顧遂行不輟弟子厭觀之走及匠石曰自吾執斧斤以隨夫子未嘗見材如此其美也先生不肯視行不輟何耶曰已矣勿言之矣散木也以爲舟則沉以爲棺槨則速

腐以爲器則速毀以爲門戶則液滿以爲樹則蠹是不材之木也無所可用故能若是以壽匠石歸櫟見夢曰汝將惡乎比予哉若將比予於文木耶夫柎梨橘柚果蓏之屬實熟則剝則辱大枝折小枝泄此其以能苦其生者也故不終其天年而中道夭自招擊於世俗者也物莫不若是且余求無所用久矣幾死今乃得之爲余大用使余而有用且得有此大也耶且也若與予皆物也柰何哉其相物也而幾死之散人又烏知散木匠石覺而診其夢弟子曰趣取無用則爲社何耶曰密若無言彼亦直寄焉以爲不知已者詭厲也不爲社者且幾有翦乎且也彼其所保與

衆異而不以義譽之不亦遠乎

莊子

棘

青棘香

終南長老入定夢天帝賜以青棘之香

釋典

商庭產棘

詳本部周太姒商將亡之兆也

木

神告勿伐大樹

臨海廨舍有大樹尉王淮欲伐之紹興郡守蕭振夢神告以伐樹故且云尉他日當作相及淮至郡謁振振勸勿伐樹淮愕然詢何從知振曰第勿伐足矣不必深究淮從之後果爲相

大木

景寧縣南有山將建廟其上其下有人夢山神以大木來獻明日果得木因名其山爲勅木山

處州志

木神爲崇

厲泉民吳偃家於田野間有一女十歲餘一夕莫知所往後數日偃夢其父謂偃曰汝女今在東北隅蓋木神爲崇偃驚而寤至明日卽於東北隅窮其跡果聞有人聲偃視之見其女在一穴內口甚小其中稍寬厥傍有古槐木盤根極大於是伐其樹挈女歸

宣室志

庭下竈居樹上

詳地理部霍顯

竹

竹山神來顯瑞鳳

唐玄宗夢一人紫服自稱竹山神來獻瑞鳳翌日果有鳳翔遂名其山爲紫籜山

台州志

竹一束

葉祖洽赴省試夢惠應王指殿下竹一束示之前此廷對惟以賦及祖洽入試始用策蓋竹一束策字也其年葉遂得大魁

八閩志

竹一株

河陰尉王君炳二子入試學院王夜夢老嫗持竹一株贈

之王令種之土阜上既寤向人說之有坐客云二郎君俱中選矣竹字兩個也未幾人來報俱有名

果

櫻桃青衣

唐天寶初范陽盧子應舉屢不第一日偶乘驢行見一精舍中有僧開講盧方詣講筵倦寢夢一青衣携一籃櫻桃在下坐盧訪其家因得遇從姑與連姻得第拜官經三十年既而夢覺服飾如故徐出門則小豎捉驢相待盧訪其時日方向午盧乃惘然知人世榮華亦如此此後遂不復求官達尋仙訪道絕跡人世云

此夢與那野枕大略相似

牡丹孔雀嘶牡丹蕊

賈雲華爲賈平章女其母邢國夫人莫氏夢孔雀銜牡丹  
蕊寘於懷中而生生而聰慧姿色絕人後嫁爲魏鵬妻卽  
所傳還魂事云

### 黃牡丹

弘治庚戌汪學士諧爲主考王文恪爲同考一夕汪夢人  
餽黃牡丹二本以問王王未有以對放榜則錢福第一已  
乃問楊學士廷和楊曰此必福之兆也不聞洛陽相君忠  
孝家可憐亦進姚黃花爲錢惟演故事平斯人也高科兆  
矣而非端士是科會試殿試福皆第一而不克終

蓮

### 紺蓮花



馮元七歲時讀易其母夜夢異人以紺蓮花與元吞之且曰善讀此後必貴顯元果登進士第歷官至戶部侍郎追老率三日一誦易云

宋史

登蓮花上

中允陳公謹嘗夢蓮花二朶甚大自空中而墜於庭有仙童女隨蓮花而下似左金童右玉女左謂公曰何不登蓮花之上公如其言蓮花冉冉而升漸入雲端心甚恐俄有神人持金冠緋袍隨與服之皆與夫人偕豈非聯科大擢之兆乎

見狀元錄于公門下士也公嘗謂于初無此夢不知纂是錄者何所本于恐是他狀元夢此而纂者

漢以為陳公故  
何之以侯參考

桂

移桂歸植

顧文康鼎臣之父嘗夢入進士鄭文康家移其桂歸植之  
已而子以狀元宰相謚文康與鄭名同蓋懸七十年而夢  
始應云

梅

梅花詩

于肅愍謙嘗於景泰四年正月十九日夢中作梅花詩云  
水邊籬下兩三枝冷艷寒香祗自知看盡春風齊結子調  
羹還有倩人時

肅愍集

梅花落英

隆慶改元長至後三日既望之夕仲氏獻翼一更後有弄

瓦之喜夢梅花萬樹落英蔽空似雪非雪心惡之書於書  
尾所生女秀而慧不幸天亡後五年子生蓋梅花落女不  
延且將結子也

梅花繁盛

詳飲食部唐太史

桃 桃花洞中

嘉靖乙酉秋李萊州廷夢桃花洞中一少年得雋已而李  
中允學詩中試蓋年八旬廡讀書處則桃花洞之麓也已而  
聯捷自都理陟吏部改內翰云

荆川文集

花 小山茶木

宋沈括嘗夢至一小山花如覆錦喬木蕭鬱山下有水甚  
樂之後謫居潤州覓得此山宛如夢中遂築室居焉因以  
夢名溪林希詩夢溪謫仙人松菊繞新宅

鎮江志

隔花泣窺井笑

唐眈娶姑少女張氏留之衛南莊眈以事入洛累月不得  
歸夜夢妻隔花泣俄而窺井笑及寤心惡之明日就日者  
卜之曰隔花泣者顏隨風謝也窺井笑者喜向泉路也居  
數日果有凶信

僧遺以花

胡尚書浚母李氏有娠夢僧以花遺之是生浚無何有僧

來索觀淡見僧卽笑僧曰此吾師後身也命我求見以笑  
為驗今果然聞者異之淡生而白眉彌月乃黑洪武中登  
進士第官給事中後歷官至尚書進少傅立朝幾六十年  
歷事六主十知貢舉國家大政多所參定為一時名臣云

花卉數十本

田不欲僉憲湖廣時以檄大木事過夷陵將禮黃陵廟神  
先夕夢神以晉時花卉數十本餽之老幹脩枝鮮古可愛  
覺而奇之翌日抵廟下禮成西詣一小禪院問禪於老衲  
衲以三十二家金剛經篆文進因思與夜夢符推席大喜  
翌日携書舟行然又嫌於釋難廣傳也遂搆小思叶旁音

感事成詩以備三十二家之體

古篆後序

月中有花

詳天象部月曾不花

蕉

蕉鹿

詳走獸部鄭人

草

拔馬蘭草

爾朱兆將入洛高歡爲晉州刺史遣長史孫騰詣兆兆曰  
可白高家兄弟吾有吉夢今行必克吾夢亡父登一高堆  
堆傍地悉耕熟惟有馬蘭草株往往猶在吾父顧我令下  
拔之吾手所至無不盡拔以此言之往必有利騰還具報

之已而兆果克京師

北史

掌中草

詳人身部辛寅遜

門東草

詳走獸部尼妙寂

蒲

大魚食蒲

詳鱗介部苻生

飲食部

食食瓜甚美

漢明帝陰貴人夢食瓜甚美帝使求諸方國時燉煌獻異

瓜種名等條長三尺而形屈曲味美如飴符所夢云

兩甌麻粥

齊宣孝陳皇后生高帝帝二歲時乳人乏乳后夢人以兩甌麻粥與之覺而有乳

同饗醎

華僑頗通鬼神常夢同共饗醎醒則醉吐狼籍

陶弘景語

李靖李勣求食

安祿山擊契丹還奏臣夢李靖李勣向臣求食上乃命祠之北郡

何得妄食軍糧



鄴城王叟家積粟至萬斛而夫妻儉嗇常食陳物纔以充腸莊宅尤廣客二百戶叟嘗巡行客坊見一客方食盤餐頗盛叟問汝有幾財而衣食過豐也客云惟有本五千逐日食利但存其本不望有餘故衣食恒足耳叟大悟歸語其妻發倉庫市珍好恣其食味不數日夫妻俱夢爲人所錄云何得妄食軍糧覺後儉嗇如初及官軍圍安慶緒於相州盡發其廩以供焉

原化記

勿食蒜韭及犬

陳光道過洞庭夢彩衣童自言是洞中龍子奉命告君勿食蒜韭及犬後三年當有所遇及期六月在河中幕府奉

檄如商州道經藍田宿驛中夢向所見童執節而來曰仙子候君遂導行至一峭壁以節扣洞戶而入此處清涼不似三伏得見仙女自言姓蔡小字次心因請陳作詩飲歎終宵不及於亂陳自作文紀其事

### 勿進殘食

宋高宗爲康王時宣仁太后時以殘食食之一夕夢神人戒令勿與殘食后驚寤

瑞應編

### 天倉

咸通中薛逢爲綿州刺史夢入洞府殺饌甚多而不覩人物有人謂曰此天倉也及寤言之於人州界昌明縣有天

倉洞洞中有自然飲食雲水者往往得而食之即使道士  
孫靈諷與親吏往訪果得洞如所夢云 感遇錄

身在宴處

王播少貧賤居揚州無人知識唯一軍將常接引杜僕射  
亞在淮南端午日盛為競渡之戲諸州徵伎樂兩縣爭勝  
負綵棚照耀江水數十年未有也凡揚州之客盡得預焉  
唯王不得見招惆悵自責軍將曰某有棚子弟悉在八郎  
但於棚內看却勝居盤筵間也王曰唯遂往棚軍將令送  
法酒一榼王方憤懣自酌遂就枕即夢身在宴處居杜之  
坐州官在下多於杜公近半良久驚覺亦不敢言於人後

爲宰相將除淮南兼鹽鐵使當時夢中判官數多一半卽  
兼并鹽鐵從事也後至五月上旬臨江宴會賓介皆在乃  
思昔夢風景氣候無不皆同

逸史

### 此家不食牛肉

陳敏功居吳門比鄰有人夢神人披髮持刀部集數十鬼  
物每經民居卽呼其人出各分飲一杯至功家則曰此家  
不食牛肉已二十年當免其疫時吳門比屋大疫獨陳舉  
家無恙

談選

### 不食別供

釋慧思辭親入道數夢神僧勸令齋戒惟一食不食別供

飲食

二〇二

二〇二

撤饌

魏重修應天甲午鄉試夢柱上懸撤饌二字初不解及中式赴鹿鳴至遲宴已撤矣

客座新聞

勿食馬肉

詳舟車部陳楊王

噉生菜遇蝦蟆毒

詳醫藥部丘傑

食茄味美

詳棟宇部大同成

飲

與杖飲以藥酒

樂安太守楊沛夢人曰八月一日曹公當至必與君杖飲以藥酒使周宣占之是時黃巾賊起宣對曰夫杖起弱者藥治人病八月一日賊必除滅至期賊果破

魏志

渴

何諷飲困沉寢夢渴作夢渴賦

唐文粹按是夢足為渴者夢飲之驗

不得茶

奚陟少年夢夏日與朝客二十餘人就一廳中喫茶陟東行首坐茶起西自南而行不得至奚渴甚不堪忍俄有一吏走入肥大抱簿書近千餘紙以案致筆硯請押陟方熱

飲食

又渴兼惡其肥忿之乘高推其案曰且將去濃黑滿硯正  
中文書之上并吏人之面手足衣服無不沾污乃驚覺夜  
索紙筆細錄藏于巾笥後十五年爲吏部侍郎時人以茶  
爲上味日事修潔陟性素奢先爲茶品一副餘公卿家未  
有也風爐越甌盃托角匙甚佳時已熱因請同舍郎就廳  
茶會陟爲主人東面首坐坐者二十餘人甌緩行又少揖  
客自西面始襍以笑語其茶益遲陟先有瘡疾加之熱乏  
茶不可得燥悶頗極遂巡有一吏肥黑抱文簿兼筆硯瀝  
汗請押陟燥忿不能堪乃推去并案皆倒正中吏面及簿  
盡污坐客大笑陟方悟昔年之夢語於同省取所記事

駭之更無分毫差焉逸史

聽經人不得飲

宋吳中有朱進士者聽佛印禪師講金剛經而悅之次日  
夢一鬼押五人朱亦同行約二里許入一門挂青布簾鬼  
揭簾俱入至廚見竈上桶內有湯五人皆飲之朱亦欲飲  
鬼喝云聽經人不得飲遂驚覺明日覓得其家扣門入問  
主人廚下有何動靜主言廚下方產六犬死其一朱乃驚  
悟

舉杯相向

元陳旅以文藝受知虞集一日集夢旅舉杯相向日旅甚



思公亦知公之不忘旅也但不得見耳既而聞旅卒時旅  
在湘江集已歸臨川去蓋千里云

酌以太清神明之醴

鐵龍道人臥石林移二更月微明及紙帳梅影亦及半牕  
鶴孤立不鳴命小童盪汲白蓮泉燃檜相竹授以凌霄芽  
為飲供道人乃游心太虛雍雍涼涼若鴻蒙若皇世會天  
地之未生適陰陽之若亡恍兮不知入夢遂坐清真銀暉  
之堂堂上香雲簾拂地中著紫柱榻綠璫几看太初易一  
集集內悉星斗文煥燁燭熠金流玉錯莫別文畫若煙雲  
口日交麗乎中天欲玉露涼月冷如冰入齒者易刻因作

太虛吟吟曰道無形兮兆無聲妙無心兮一以貞百象斯  
融兮太一以清歌已光飈起林末激華氛郁郁霏霏絢爛  
淫艷迺有履綠衣若仙子者從容來謁云名淡香小字綠  
花乃捧太玄杯酌太清神明之醴以壽予侑以詞曰心不  
行神不行無而為萬化清壽畢紆徐而退復令小玉環侍  
筆牘遂書歌遺之曰道可受兮不可傳天無形兮四時以  
言妙乎天兮天天之先天天之先復何仙移間白雲微消  
綠衣化烟月反明予內予亦悟矣遂冥神合玄目光尚隱  
隱於梅花間小芸呼曰凌霄芽熟矣

臧崖文集河南褚與跋語謂鐵崖先生作

煮茶夢有黃

梁仙人之意

飲食

明歲雞水酌

戊申之歲唐太史汝楫夢一梅樹生於庭前花娟靚繁盛  
字隱隱見於瓣中曰明歲相逢雞水酌明年為己酉唐果

中式云

狀元錄

夢占類考卷四